



Annunzia per la chatscha da regulaziun da chauras-capricorn 2026

1. Premissa per s'annunziar per la chatscha da regulaziun da chauras-capricorn

S'annunziar per la chatscha da regulaziun da chauras-capricorn pon mo chatschadras e chatschaders ch'èn ids almain ina giada a chatscha d'ina chaura u d'in buc da capricorn en il chantun Grischun. L'onn da l'ultima participaziun a la chatscha da capricorns en il chantun Grischun n'ha nagina influenza sin il dretg da s'annunziar.

Er chatschadras e chatschaders ch'èn gia s'annunziads per la chatscha d'ina chaura u d'in buc da capricorn u che vulan far quai quest onn, han la pussaivladad da s'annunziar per sajettar duas chauras-capricorn betg lactantas. Sch'ina chatschadra u in chatschader è s'annunzià per tuttas duas chatschas e sch'ella u el vegn determinà tras la sort per tuttas duas chatschas, ha la chatscha regulara d'ina chaura u d'in buc la precedenza.

2. Modalitads da la chatscha da regulaziun da chauras-capricorn en cumparegliaziun cun la chatscha da capricorns regulara

Per che la chatscha da regulaziun da chauras-capricorn na prolungheschia betg ils temps da spetga per la chatscha da capricorns regulara (chaura e buc), vegn ella resguardada independentamain da la chatscha da capricorns regulara. Quai vul dir, che per s'annunziar per la proxima chatscha d'ina chaura u d'in buc da capricorn regulara quinta l'onn da l'ultima participaziun a la chatscha da capricorns regulara. La chatscha da chauras-capricorn n'è betg suttamessa ad in ritmus annual e na quinta betg sco chatscha exequida.

L'annunzia per la chatscha da regulaziun da chauras-capricorn è gratuita per las chatschadras ed ils chatschaders. In'annunzia vala dentant mo per in onn e na vegn betg transferida sin l'onn proxim. Sch'ina chatschadra u in chatschader na vegn betg determinà tras la sort quest onn, vegn l'annunzia stizzada. L'onn suandant èsi pussaivel da s'annunziar danovamain. Tar la chatscha da regulaziun da chauras-capricorn na vegnan qua tras er betg transferids ils dretgs dad ir a chatscha sin l'onn proxim, sche la chatschadra u il chatschader è malsau u ha in accident.

3. Colonias resp. colonias parzialas che pon vegnir tschernidas

Igl è pussaivel da sajettar duas chauras-capricorn betg lactantas mo en las colonias resp. colonias parzialas menziunadas qua sutvart:

☐ Albris	☐ Macun
☐ Val Bever	☐ Umbrail (Val Mora)
☐ Güglia Nord Avras (Piz la Tschera)	☐ Rothorn/Weissfluh
☐ Güglia Nord Avras (Alp Sut Fuina/Alp Mos)	☐ Hochwang
☐ Güglia Nord Surses	☐ Stussavgia/Valragn (Glaser Grat/Lüschgrat)
☐ Veraina	☐ Stussavgia/Valragn (Verdus/Fareina)
☐ Val Tuors	☐ Caschleglia/Vial
☐ Barlas-ch/Lavinuoz	☐ Alpsu/Frisal (Tujetsch Nord)
☐ Tuoi/Tasna	☐ Alpsu/Frisal (Punteglias)
☐ Chöglias/Samignun (Lavér-Chöglias)	☐ Alpsu/Frisal (Panix)
☐ Chöglias/Samignun (Samignun)	☐ Calanda
☐ Fergen/Seetal	

Annunzias vegnan acceptadas mo per ina da las colonias resp. colonias parzialas menziunadas qua survart! Sco survista vala er la tabella «Publicaziun chatscha da capricorns 2026» che stat medemamain a disposiziun sin la pagina d'internet www.ajf.gr.ch.

4. Procedura d'annunzia

Annunzia digitala sin il ePortal dal chantun Grischun

Las chatschadras ed ils chatschaders che han il dretg da s'annunziar, pon far quai dals **2 fin ils 13 da mars 2026** sur il ePortal tar l'Uffizi da chatscha e pestga dal Grischun. Infurmaziuns ed il link tar il ePortal chattais Vus sin la pagina d'internet [Chatscha da capricorns – La chatscha en il Grischun](#). En cas excepziunals pon las personas che na pon betg s'annunziar sin via digitala per la chatscha da capricorns, u che n'han nagin med da pajament digital, s'annunziar per telefon tar l'administraziun da la chatscha da capricorns.

Annunzias per e-mail n'èn betg admessas e na vegnan betg resguardadas!

Tenor la publicaziun ston las chatschadras ed ils chatschaders inditgar la colonia resp. la colonia parziala en la quala ellas ed els vulan ir a chatscha da chauras-capricorn. Il guardiaselvaschina cumpetent attribuescha il territori da chatscha.

Attenziun: Las chatschadras ed ils chatschaders determinads tras la sort per la chatscha da regulaziun da chauras-capricorn, survegnan il cumenzament da zercladur 2026 ina invitaziun per la saira d'infurmaziun sco er per l'inspeziun il di suenter. I vegn desistì d'infurmar las chatschadras ed ils chatschaders betg determinads tras la sort.

La chatscha regulara da chauras-capricorn è fitg pretensiusa per las chatschadras ed ils chatschaders arguard las abilitads alpinas, la cundiziun, il giuditgar ils animals e l'abilitad da sajettar. Per regular las grondas populaziuns da capricorns èsi fitg impurtant che la chatscha da regulaziun vegnia pratitgada en moda intensiva. Per quest motiv recumandain nus da ponderar bain eventualas annunzias, da far las preparativas correspundentas e da reservar trais emnas durant l'atun per la chatscha da capricorns.

5. Termin e durada da la chatscha

Per impedir conflicts tranter chatschadras e chatschaders da la chatscha da capricorns regulara (chaura e buc) e talas e tals da la chatscha da regulaziun da chauras-capricorn sco er frustraziuns nunnecessarias, vegnan las duas chatschas realisadas en differentas etappas u en territoris separads. Perquai ch'ins sto sajettar l'emprim ina chaura-capricorn betg lactanta avant da pudair sajettar in buc, han las chatschadras ed ils chatschaders da la chatscha da capricorns regulara la precedenza. Omaduas chatschas èn tranter il 1. d'october ed ils 15 da november e duran 20 dis per chatschadra u chatschader. Ils temps da chatscha vegnan communitgads cun l'invitaziun a la chatscha da capricorns (previsiblamain il cumenzament da zercladur 2026).

Sche las chatschadras ed ils chatschaders n'adempleschan betg ils plans da decimaziun, sajetta la surveglianza da chatscha las chauras-capricorn mancantas.

6. Basas legalas

La chatscha da regulaziun da chauras-capricorn tenor regions vegn exequida, cun resalva da l'approvaziun da las Prescripziuns da chatscha 2026 tras la Regenza il zercladur.

UFFIZI DA CHATSCHA E PESTGA
DAL GRISCHUN

Administraziun da la chatscha da capricorns